

SCHOTTEDICHTER



Fasnacht 2023

Risäiggle isch geil – dr Plotsch goht hüt steil

All Schaltjoor het dr VVP,
au emol e Glanzidee,
sälber baschtle – do möche diä nid mit,
nid dass es no öppis z'schaffe git.

Dr Schädeli isch jetzt nümme älle,
nei dr Felix macht ein uf Schilbi 2:
«Ich mein als König Altenbach,
dä Weg vo Ruswil isch ne super Sach!»

E bitz recycle und fürs Näscht no frisches Heu,
denn funklet alles fascht wie neu
und äso chunnt's bi eus denn au nid so wyt,
wie bim ESAF mit däm Defizyt».

Dä kopierti Märliwäg chasch erläbe - jo dasch wohr,
dä isch öppe so modärn wie vor 50-ig Joor,
wie d'Bürgermein duet dr VVP verfare –
jo bi de Riiche lersch halt ebbe spaare.

Nachem gliche Konzäpt hämmer usegfunde,
bechunnt dr FC e neus Clubshüüsli in dr Gruebe unde,
mir hoffe denn nur, dass diä Pflutte,
besser baue als si schutte.

Bim «grosse» FCB dien si unsverworge,
drfür dr Karli als Altascht no entsorge,
jetzt no e günschtige Trainer installiere,
denn längt's au no zum s'Joggeli saniere.

G'altered bisch au im Eventdorf unde,
bis de dört nach villne Stunde,
an dr Kasse ändlig hesch chönne bstelle,
hän si im Dorf scho afo dr Wiennachtsmärt stelle.

Apropos ESAF – dört isch s'nochemache,
bi de Läbigpryse nümme zum lache,
denn am Schluss isch das arme Vieh,
für e Wicky Joel halt nur e billigi Kopie.

Au mir gizige Schotte sin cheibe nochhaltig,
und recycle au – dasch doch gwaltig,
dä Märliwäg wird nomol trimmt,
und grad uf Retro-Style no pimt.

Nur uf dr Verwaltig bi däne Wäse,
nimmsch gschiider grad e paar neui Bäse,
denn wieder-verwärte – ihr liebe Lüt,
chasch uf dr Gmein jo sicher nüt.

Das fiehrt eus – ojemine,
grad diräkt zum Fasnachts-Komitee,
dört schänke mir e jedem Dotsch,
zum Schluss e persönliche Recycling-Plotsch.

